

CYBER SECURITY AND SOCIAL MEDIA SECURITY

*By Lalthlamuana,
Chief Informatics Officer,
Deptt. of Inform. & Commn. Technology*

Cyber tih tawngkam hi Cybernetics tih atanga lakchhuah a ni a, Information Technology and Communication thiltihtheihna khawvel sawina a ni. Thenkhat chuan tuna kan khawvel hi Cyber World tite pawhin an sawi bawk thin. Cyber World chhungah hian keini pawh kan cheng ve mek a ni. Cyber World a changkan rualin Mizote pawh kan lo changkang chho ve zel a, tunhmaa Computer leh Internet kan neih phaka kan rin loh pawh hmun tin deuh thawah hman tur kan lo nei ta. In lama telephone kan kawl thin pawh tunah chuan kan kalna apiangah kan kengin, naupang thlengin mobile phone kan lo nei fer fur ta mai. Camera leh music player pawh a hranpa a neih ngai tawh lovin Mobile Phone-ah a awm nghal ta zel bawk a. Kan thlalak leh hlate chu album leh cassette a dah tawh lovin Computer leh Mobile-ah te digital form-in kan lo dah ta zel a. Bank-a pawisa la chhuak tur pawhin Bank kal kher lovin ATM machine atangin pawisa duh hun hunah kan la chhuak thei tawh bawk a. Phaia zin tan pawh pawisa ken aiah Credit Card /Debit Card hmangin kan duh zawng thilte kan lei thei ta. Tin, Internet kaltlangin khawvel hmun danga thawmhnaw leh thildangte pawh kan chah chhuak zung zung ta mai. Tunah chuan phai lama fate dah pawhin M.O (Money Oder)/Bank Draft siam ngai tawh lovin an mahni Bank Account-ah thun sakin naupangten an duh hun hunah ATM atangin pawisa an lo la chhuak zung zung thei ta bawk a. Tunhma lama lehkha kan inthawn thin pawh tunah chuan e-Mail hmangin kan in thawn zung zung thei ta. A taka thian kawm aiah social network – *facebook, twitter, Whatsapp, Messenger, Wechat, etc.* hmangin khawvel hmun hrang hranga thiante kawm kan uar ta hle bawk.

He Cyber World chhungah hian keini pawh kan cheng mek a, kan bank account-te leh personal information zawng zawngte chu khawvel pumah thlun zawm mek a ni. Kan mobile handset-te pawh hi khawvel mite nen engtik lai pawha inthlunzawm reng a ni. Khawvel a changkan poh leh سوالna pawh a changkang ve zel a, tun hmaa misualten silai nena bank an rawk thin kha tunah chuan computer hmanga bank rawk a lo ni ta a, lehkha thawn hmanga invauna (extortion) leh mi hruaibo (kidnapping) te pawh e-Mail leh Mobile Phone hmanga tih a lo ni ta zawk a, nawhchizawrhna leh call girls te pawh Internet leh Mobile phone kaltlanga tih a lo ni leh ta zel a, terrorist-te tan سوال rawngbawlna hmanraw pawimawh leh tha tak anih bakah khawvel ram hrang hranga terrorist-te inzawmkhawmna hmanrua pawimawh tak a lo ni ta. A bik takin Internet hian ramri kham chin a neih loh avangin thilsual titute man chhuah an harin سوال rawngbawlna hmanraw tha tak a ni. Hetiang anih avang hian misualten rem changah lain kan hriat lovin kan bank account-a pawisate pawh an lo ru chhuak thei a, kan personal information-te pawh an lo hmang khaw lo thei bawk a ni.

Kan ramah pawh hian IT hman khawlohna hi a hluar sawt hle a, a invenna (security) lam hi kan ngaihthah avangin tunah hian harsatna tawk mek kan thalaite zingah tam tak an awm a ni. Kan ram leh hnam mualphona min thlen theitu hmanraw chak tak anih avangin heng laka kan lo fimkhur theih nan tun tumah hian Cyber Security leh Social Media Security chung chang kan zirho dawn a ni. Ram leh hnam humhalhna kawngah pawh hemi chung chang hi kan hlamchhiah loh a pawimawh khawp mai.

INTERNET ETHICS



Internet hmangtute hian awmdan mawi leh dik kan lantir tur a ni. Chuvangin kan rinawmin (honest), midangte dikna (rights) leh thilte (property) kan zah sak tur a ni. Awmdan mawi lo langsar tak pakhat chu copyright bawhchhiatna (violation) hi a ni. Internet hmangtu zawng zawng ten thil hriat tur pawimawh tak tak kan nei a, chungte chu:

Acceptance

Internet hi engkim a thlawna thil hmuh theihna leh neih theihna a ni lo tih kan hre phawt tur a ni. World Wide Web (WWW) chhunga thil awmte hian hlutna tam tak an nei tih hria ila, chumi hmanng tangkai tur chuan kan inzirtir zawk tur a ni. Internet hian mi zawng zawng society (universal society)ah hmun pawimawh tak a chang a ni tih hriain kan society pawhin chu chu kan pawm tur a ni.




Sensitivity to National & Local Cultures

Internet hian ramri kham chin a nei lova, local TV channel leh local newspaper angin thlen chin a nei hek lo, khawvel hmuntin reng a fan chhuak vek a ni. Hetiang anih avang hian ram leh hnam hmingchhiaha pawh hotein a darh nghal vek zel thin.

While using e-Mail & Chatting

Internet hi chhungte leh thiante nena inbiaktawn nana hman tur a ni. Hmelhriat lohte nen a titi (chatting) emaw eMail inthawn tur a ni lo. Hetianga hmelhriat lohte nena eMail leh Chatting hlauhawm zia naupangte hnenah hrilh hriat thin tur a ni.




Pretending to be someone else

Internet hi mahni nihna thukru a, midang anga in chhal a, mite biak nana hman loh tur a ni. Heng hi naupangte hnenah dan bawhchhiatna a nih avangin a hlauhawm a ni tih zirtir tur a ni.

Avoid Bad Language

Internet hmanga chatting, blogging, social networking, eMail kan tihin tawngkam mawi lo leh chaltlai tak tak hman loh tur a ni. Mite hmuha mawi leh zahawm taka hman tur a ni.



Hide Personal Information

Mahni nihna - home address, phone number, password te hmelhriat loh hnenah pek mai mai tur a ni lo. Mahni thlakal phe chu hriatchian lohte hnenah pek loh tur a ni chutilochu kan hriat miah lohin an lo hmanng khaw lo thei a ni.

While Downloading

Internet hi music ngaihthlak nan te, video en nan te leh online games khelh nan te hman tam ber a ni a. Mahse copyrighted download emaw midang hnena pek chhawn hi khap anih avangin a tiluite chu dan anga hrem theih a ni tih hriat tur a ni.




Supervision

Naupang kumtling loten Internet an hman reng rengin nu leh paten kan hriatpui mai bakah an bulah kan awm ngei ngei tur a ni. Nu leh pate kaihhruaina hnuai loah chuan naupang ten Internet an hmang tur a ni lo.

Encourage Children to use Internet

Naupangte hnenah Internet hman khap aiin hmang tura fuih zawk tur a ni. Mahse an lehkha zirlai puitu tur leh an hriatna tipung tur zawnga hmang tura zirtir tur a ni.



BROWSER SECURITY



Web browser hi application software pakhat a ni a, Internet atanga information - music, video, news, graphics, animation, etc lak nan hman thin a ni. Web browser chu Internet-a hman tur bika tih a ni a, a bikin web pages enna tur bika siam a ni. Web browser leh Internet chu lak hran theih loh khawpa inzawm tlat a ni a, browser tel lo chuan Internet hian hlutna a nei tam lo hle ti ila kan tisual tam lovang. Web browser chu Internet-a hmanraw tangkai tak, Personal Computer-ah leh Mobile phone-ah an hman nasa hle. Tunlaia Web browser zinga an hman lar deuh deuhthe chu - Mozilla Fire Fox, Internet Explorer, Google Chrome, Opera, etc. Web browser hi tawng hrang hrangin a awm bawk a entirnan Chinese, Japanese, German, Arabic, etc.

Security Risks

Web browser hrang hrangte hi mahni duh dan anga security setting tih danglam theih tura siam vek a ni a, chuvangin Internet hmangtuten security setting hi an hriat a pawimawh hle. Web browser security setting-ah hian “enabled” tur leh “disabled” tur tam tak a awm a chungte chu kan tih that tawh loh avangin kan computer-te a him tawh lo thei a ni.



Cookies

Browser hmanga website hmun hrang hrang kan tlawh kualin chu'ng chanchin (history)-te chu computer hard disk chhungah browser hian text file angin a dahtha thin a, chung a dahthate chu “cookies” an tih chu a ni. Internet hman zawh ve leh heng cookies-te hi browser setting hman khan paih tir zel tur a ni. Heng cookies atang hian hackers hovin kan personal information thenkhatte an lo nei ru thei thin a ni.

Spyware

Spyware hi computer software chikhat a ni a, a hming ang hian computer neitu hriat miah lovin computer chhungah a lo awm ru reng thei. Spyware hi computer chhungah a lo awm a nih chuan personal information leh file thenkhatte kha midang hnenah Internet kaltlangin a lova thawn chhuak thin. Spyware chikhat “keystroke loggers” phei hi chuan keyboard atanga kan thil type reng reng hi a rukin a neitu/siamtu hnenah a lova thawn thin. Computer chhunga spyware lo awm dan tlangpui chu Software hriat chian loh atanga kan computer-a kan installed-na atangte leh Internet site him lo atanga thil kan download atangtein a ni a. A tlangpuiin peer-to-peer file sharing entirnan- TORRENT atanga music leh video kan download atangtein kan kai tam ber thin.






Phishing (Spoofing)

Phishing chu inbumna chikhat a ni a, web browser chhunga user interface-te hi a hmangtute hriat miah lohin tuten emaw an lo thlak danglam thin a, chutiang chuan browser hmangtute chu hruai kawiin website him lo hmunah a hruai kawi daih thin.

Eavesdropping

Browser hmangtuten Internet an hmandan kimchang, an hriat loh a lo chhinchhiahtu a ni. Heng atang hian kan Internet hmandan kim chang Hackers-ten an lo hre thin.



Malicious Scripting

Website thenkhat-ah program hlauhawm tak a awm tel thei a, chung website-te chu browser hmangin tuten emaw va tlawh (visit) sela, an computer-ah virus hlauhawm tak a kai phah thei a ni.

Security Tips:

- (1) Web Browser security setting hi a sang thei ang bera dah tur a ni.
- (2) Web Browser update fo tur a ni.
- (3) Website hriat chiante chu trusted sites-ah dah thin tur a ni.
- (4) Email messages dawn reng reng plain text-a chhiar thin tur a ni.
- (5) Browser hman laia windows PoP-up lo lang thin hi block thin tur a ni.
- (6) Browser setting-ah “remember password for sites” tih hi disable tur a ni.
- (7) Browser setting-ah bawk “warn me when sites try to install add-on” tih awm hi enable tur a ni.
- (8) Website tlawh turte, a URL atangin a dik leh dik loh finfiah hmasak thin tur a ni.

DESKTOP SECURITY



Computer hi khawi hmunah pawh hmuh tur a tam ta khawp mai. Computer chhungah hian Hard Disk a awm a, chhungah te chuan thil pawimawh tak tak - files, music, video, photos, etc. te kan dah thin. Heng kan thil dah thatte hi vawnhim a nih loh chuan mi tuten emaw an lo ru chhuak thei a, an lo hmangsual (misuse) thei a ni. Computer security chung chang kan hriat vak

loh avangin kan information / data dahte a hmu lo turten an lo hmu fo thin a, a chang chuan kan duh loh deuh thilte an lo 'copy' a, an lo tidarh thin a ni. Kan Computer chhunga data-te him taka kan vawn theih nan eng emaw chen chu computer security kan hriat a pawimawh a ni.

Security Tips

- (1) Operating System (eg. Windows, Linux, etc) siamtute hian kan computer a lo him theihna turin patches (thawm) an siam chhuak thin a, heng patches thar ber ber hi kan computer-ah install thin tur a ni.
- (2) Antivirus software thar tha tak kan install tur a ni a, a khat tawkin kan update thin tur a ni.
- (3) Firewall hi OS leh Antivirus thenkhat hian a keng tel thin a, heng hi kan "enabled" tur a ni. Firewall hian hackers lakah te, virus lakah te leh worms lakah te kan computer a veng him thei a ni.
- (4) Computer hi 'password' hmangin i venghim ngei ngei tur a ni a, midangin an duh hun apiangin an hawng thei tur a ni lo. I private data an lo ru chhuak palh thei a ni tih hriat tur a ni.
- (5) Computer-a file i delete tawh hi a thiam tan chuan 'recover' leh theih a ni tih hriat tur a ni.
- (6) Public computer (cyber café etc) ah private data leh midang hriat atana i duh loh ang chi reng reng chu dah loh tur a ni
- (7) Pen drive i hman reng rengin i computer-ah virus a luh loh nan fimkhur la, USB security software install ngei ngei ang che.
- (8) Virus executable file hi folder icon angin an awm ve thin a, folder emaw tia hawn dawn chiah hian virus kha a lo run thin a ni (e.g. new folder.exe)
- (9) I computer-ah nangma personal codes (passwords etc) i dah tur a ni lo, i thinlungah i vawng reng tur a ni

MOBILE SECURITY

Mobile Phone kan han tih hian kan rilruah thil pahnih a lo lang nghal a; a pakhatnaah chuan mobile handset a ni a, chu chu “Mobile Equipment (ME)” an ti bawk; a pahnihnaah chuan Subscriber Identity Module (SIM) card an tih hi a ni. Mobile handset-te hian chhinchhiahna an nei vek thin a, chung chhinchhiahna chu IMEI (*International Mobile Equipment Identity*) number an ti. IMEI number chu 15 digit a ni a, Moon Corporation Database-ah registered (chhinchhiah) vek an ni.



SIM Card pre-paid tihnunsa zawrh leh hman hi dan bawhchhiatna sual lian tham tak a tling a, heng dan bawhchhiate hi lungin tan tir bakah pawisa tam tak chawitir theih an ni bawk. SIM Card tihnunsa zuar tur chuan tuemaw hminga SIM Card kha lo registered lawk a ngai a, sumdawn nan midang hnenah an hralh leh thin. Heng SIM Card tihnunsa zuartute hian dan an bawhchhiat avangin an chungah hremna dan “Forgery Case – IPC 465” leh “Defamation Case – IPC 499” lekkawh theih a ni. Tin, a leitu pawh khan a ma hming ni lova SIM Card a neih avang khan IPC – 416 hnuaih hian hrem theihna dan a awm bawk a ni.

Mizoram hi International Boundary a awm anih vang leh Terrorist-ho kan chheh velah an awm reng avangin SIM card tihnunsa hmangin sual rawng an bawl thei a, a titu dik tak manchhuak si lovin mipui pawisawi lo zawk ten kan tawrh phah thei a ni. Heng SIM Card prepaid tihnunsa zawrh avang hian kan ram mipuite hi kan him loh phah thei a, chuvangin kan fimkhur tlan a ngai tak zet a ni.

Security Tips

- (1) Mahni mobile a IMEI code hi chhinchhiah tur a ni a, mobile phone a lo bo palh pawhin IMEI code hmangin operator-ten an block thei a ni.
- (2) Mobile phone hi mahni credit card/debit card leh bank online password-te dah nan hman loh tur a ni..
- (3) Bluetooth ON sa a dah reng tur a ni lova, Bluetooth connection reng reng lang lo (invisible mode) a dah thin tur a ni.
- (4) I mobile connection kha nangma hmangin i register tur a ni. Nangma hminga register a nih loh chuan man theih i ni.
- (5) I mobile phone-ah khan ‘pirated’ hla/ videos reng reng dah suh ang che.
- (6) I phone a chhiatin authorised dealer emaw dawr rintlak-te hnenah chauh siamtir tur a ni. A part thalai an ruksak theih che bakah i thil delete tawhte thlengin a haichhuah sak thei che tih i hre tur a ni.
- (7) I mobile phone kha zahmawh rawngkai thlalak nan hmang suh ang che, i tum loh deuhin i mualpho thei a nia, ser reh thei tawh lo i nei mai ang.

- (8) I ngaihzawngin thla lakpuia a sawm che chuan midangte hmuh atana i duh loh chuan laktir suh ang che, nakinah nangmah 'blackmail' nan a la hmang mai ang.**
- (9) I photo ID etc kha mobile connection siamtir nan midang hmantir suh ang che. I hminga mobile connection siam a nih a, kha mobile kha thilsual (Midang vau leh rikrap etc) tih nan hman a nih chuan man theih i ni ang.**

INTERNET SECURITY

Internet hi khawvel hmun hrang hrang chanchin hriat theihna awlsam tak anih avangin a tangkai em em a ni. Information kan mamawh ang chi subject hrang hrang hmuh tur a tam em em a, zirlai tan a tangkai a, kut hnathawka ei zawngte leh Industrialist ropui ber ber tan te, Pathian thuhirilna atan te, Misual tan pawh thilsual tihna hmun rem chang tak a ni bawk. Internet connection tha deuh kan neih hunah chuan IPTV (*Internet Protocol Television*) hmangin TV programme hrang hrang te kan la en thei thuai dawn a ni. Inbiakpawhna (voice) lamah pawh IP Telephone hmangin khawvel hmun hrang hranga mi kan thiante, man tlawm te tein kan la be pawp zung zung thei dawn a ni.




Tunah hian Internet tel lovin mi tamtak chuan hna kan thawk thei tawh lova, e-mail te pawh hmun tamtakah chuan official a pawm a lo nih tawh bawk avangin tuman kan hnualsuat thei tawh lo a ni. Thian kawm nan te, pawisa thawn nan te, music leh video download nan te, mi ram chanchin zir nan te, hotel booking leh Airline booking nan te kan hmang nasa em em tawh a ni. Hetianga kan hman nasat em avang hian misualte tan thilsual tihna hmun rem chang tak anih avangin Internet kan hman chungchangah fimkhur a ngai em em a ni.

Security Tips

- (1) Internet atanga thil download laiin application software reng reng “run” loh tur a ni a, firewall leh Antivirus tih nun tur a ni.
- (2) Website i hriat chian loh atangin music, video, games leh thil dang reng reng I download tur a ni lo.
- (3) E-mail i hriatchian loh hnen atanga I dawng anih chuan hawng mai mai suh, i hawn veleh i computer a khawih pawl palh thei.
- (4) Free download tih avangin download tum ngawt zel tur a ni lo, hengah hian malicious software a awm thei a chung chuan I computer a ti chhe thei a, I personal data an ruk sak thei che tih hriat tur a ni.
- (5) Internet i hman zawh veleh browsing history/ cookies zawng zawng i paih vek tur a ni. I password pheih chu ‘save’ miah loh tur a ni.
- (6) Website address kha en la, i thil download tur kha https (secure network) anih chuan a hlauhawm lo turah ngai la, http (unsecure network) ringawt anih chuan fimkhur hle ang che.
- (7) I thian hnenah file I thawn dawnin .DOC file in thawn suh ang che, macros a awm theih avangin I computer a virus kha a kai thei a ni. Chuvangin .DOC file aiah RTF format in thawn la macros a awm thei lo a ni. Anih loh paw’n .PDF ah convert la, chu chu thawn mai tur a ni.

ONLINE BANK SECURITY



Tunlai hian 'Online banking' pawh kan uar ve ta viau mai. Online banking-ah chuan miin a bank account kha internet kaltlangin a 'access' thei a, transaction pawh a ti thei a ni. Internet kaltlanga bank account luh dawn hian 'username' leh 'password' combination hmanga luh a ni tlangpui.

Internet banking hi mi thenkhat chuan kan hman tangkai viau tawh laiin mi thenkhat erawh chuan kan la hriatchian loh avangin kan la hmang ngam meuh rih lo. Online banking hi a thatna lamah chuan a awlsam a, khawi hmun atang pawhin kan pawisa kan lachhuak thei a, pawisa tel lo pawhin kan bank account atangin thil kan lei thei a ni. Tin, nakin lawkah phei chuan internet atangin phone bill, tui bill leh electric bill thlengin kan pe thei tawh dawn a, thil tangkai tak a ni.

Mahse a lehlam zawngin han thlir ta ila; hetianga thil a awlsam lai hian rukru leh misualho pawh an awm mai mai bik lova, kan pawisa ruk theih dan an lo zawng ve ngar ngar a ni tih hi hriat tur a ni. Chutihlaiin tunlai khawvel thiamna sang zel hi kan man ve zel loh chuan kan hlui mai dawn si a, Chuvangin mipuite pawh kan intuaithar ve zel a, chak taka thil kan man ve a ngai. He'ng a hnuai point pawimawhte hi zawm tum ila, kan sawi vek seng lo ang a, mahni pawh kan inzir belh zel dawn nia.

Security Tips

- (1) I password / PIN code hi post kaltlangin i dawng ang a, hei hi mi tumahin an hrilh tur che a ni lo. I dawn laiin tih chingpen anih chuan hmang lovin Bank hotute hrilh nghal vat tur a ni.
- (2) I password / PIN code reng rengte midang i hrilh tur a ni lo a, lehkha-ah pawh i ziaak tur a ni lo, i thinlungah i vawng reng tur a ni
- (3) “Remember password” leh “Auto login” option reng reng i hmang tur a ni lo.
- (4) I bank account neihna website i hrechiang tur a ni.
- (5) Online banking i tihna website chu a him tawk tur a ni.
- (6) Phishing / Pharming lak atangin i inveng dawn nia.
- (7) Transaction i tih zawhin browser kha “close” ringawt lovin i sign-out/ log-out ngei ngei tur a ni.
- (8) Transaction i tih zawhin computer-a Cookies/ History zawng zawng clear vek tur a ni.
- (9) Transaction i tih thinna account-ah khan pawisa tamtak dah a tha lo, fimkhur nan leh tihsual palh a awm theih avangin.

Heng a hnuaia mi te hi a tlangpuin i himna entir theitu a ni ang:

- (a) Address bar-a address kha a dik tur a ni.
- (b) Address bar address kha “https://...” in a intan tur a ni.
- (c) Browser khan warning message a rawn tilang lo.

CREDIT CARD / DEBIT CARD SECURITY

Online shopping tih nana kan hman lar ber chu Credit Card leh Debit Card hi a ni a. Tin ATM atanga pawisa lak chhuah nan Debit Card kan hman thin. Phailama lehkha zirlai ten Mizoram an lo haw dawnin an Debit card-te mi tute hnenah emaw hralh an ching thin, hei hi tih loh tur a ni. Debit Card kan hralhna ten Internet kaltlangin mi Bank Account atangin pawisa an ru chhuak a, chu an pawisa ruk chu zirlai account-ah khan an dah lut thin a, tichuan ATM Debit card hmanin chu pawisa chu an va la chhuak leh thin. Hetiang rukrukna hi chhuichhuah anihin Bank account neitute man hmasak an ni thin a, chuvangin hetiang laka kan him theih nan kan ATM Debit Card-te hi tu hnenah mah kan hralh chhawng tur a ni lo.

Security Tips

- (1) Credit/Debit Card PIN (Personal Identification Number) hi thlak thin tur a ni.**
- (2) ATM Debit Card ah PIN number ziah loh tur.**
- (3) Online transaction i tih dawnin website address bar uluk takin en la, a address a dik em tih leh <https://> in a in tan em tih finfiah hmasa thin ang che.**
- (4) Online transaction hi Cyber Café atangin ti lo hram ang che.**
- (5) Credit card/ Debit card leh Bank account kimchang eMail kaltlangin thawn lo hram ang che, misualin i eMail an lo hawn palh laka i him theih nan.**

SOCIAL NETWORK SECURITY

Mihringte hi mahni chauha khawsa thei kan ni lova, midangte nen inrinchan tawna nung leh khawsa vek kan ni. Computer leh Mobile khawvelah pawh mahni maia khawsak theih anih loh avangin awlsam taka kan inbiak pawh a, thu leh hla, thlalak leh video kan inthawn tawn zung zung theih nan khawvel huapzo Network siam a ni a, chu chu Social Network kan tih hi a ni.



Social Networking kan hman lar deuh deuh te chu - Facebook, Whatsapp, Wechat, Twitter, Messenger, Youtube etc. Heng Social Network-ah te hian kan personal information te, thlalak te leh kan ngaimawh zawng thu chi hrang hrang kan post thin a, chungte chu kan thian (friend) ten an lo hmuin an duh leh an “Like” a, an “Comment” bawk a. Hetiang khawvelah hian kan thalaite an lut mek a, a zunah an uai a, an atchilh bawk a, a taka thian kawm aimahin an ngaina zawk emaw tih mai tur a ni.

He social networking hian thatna tamtak nei mahse mi tamtak tan chhiatna a thlen thei a ni. Mi thenkhat ten mahni nihna thupin midangte sawisel nan te, dik lo taka sorkar sawisel nan te, mi thlalak dukdak lo tak tak tar chhuah nan te, mi intihhmingchhiat nan te leh invau nan te an hmang thin. Heng zawng zawng hi dan bawhchhiatna sual lian tham tak a ni a, social network hmangtute kan fimkhur a tul tak zet a ni.

Security Tips

- (1) Nangma chanchin kimchang reng reng social networking site-ah dah suh ang che
- (2) Mi i la hriatchian lohte hnenah i chanchin hrilh vak suh la, biak dan chin tawh hria ang che
- (3) I thlalak reng reng, midang hmuh atana i duh loh chu dah reng reng suh. Nakinah kawppui dang i la nei thei a ni tih hria la, fimkhur thiam ang che
- (4) I mi hriatchiante chauh lo chu ‘Friends’ angin pawm lo ang che
- (5) I thiante chanchin kimchang pawh dah loh a tha, hlauhawmah an awm ve thei
- (6) I thil thawn reng reng hi midang kutah a awm tawh tih hria la, i duh thu ngeiin i paih thei tawh kher lo. I paih emaw i tih lai khan a site neituten an kawh tha reng thin a nia.
- (7) Social Networking atang hian inbiak tlangnel a awl hle a, a tak taka inhmuh kher tum a tha lo. Inhmuh kher i tum a nih pawhin hmun ualau chauh i thlang dawn nia
- (8) I lan that berna thlalak i dah thin a, midangin an rawn fak che hian lawmna vak tur a awm lo. An rawn fak che khan nangmahah nuam tihna a awm a, khami khan i duh loh thlengin a hruai ang che
- (9) I thiante zingah hetiang ching an awm a nih chuan a hlauhawm theihna i zirtir ve dawn nia.

FREQUENTLY ASKED QUESTION

1. Pre-paid SIM Card tihnunsa zawrh leh hman hi dan bawhchhiatna a ni em? Mipui tan awlsamna min siama engnge a pawina awm?

Aw ni e, dan bawhchhiatna a ni. SIM Card pre-paid tihnunsa zawrh leh neih hi khap a ni. SIM Card tihnunsa zuar tur hian tu emaw hming hawh a, an thlalak, identity leh address proof te hman a ngai thin. Hetianga tih anih loh chuan SIM Card tihnunsa a awm thei lo. Tuna i SIM Card hmanlai kha tu emaw hminga registered anih chuan i ta lo i kawl tihna a ni a. Forgery Case (A lem siam chawp case) chu chu IPC Section 465 dan hmangin I chungthu rel theih a ni a. Chuta hremna chu kum hnih thlenga tantir theihna emaw pawisa chawitir emaw a pahniha hremna emaw pek tur a ni. Hei hian SIM Card tih nunsa zuartu leh hmangtu a huam a ni.

Mipui tan awlsamna min siam sak rualin harsatna min thlen theih avangin kan fimkhur hle tur a ni. Entirnan, Misual pakhatin i hminga SIM Card registered - tihnunsa leiin facebook emaw CATV (fakselna/mipuiaw) kaltlangin mi a huat zawng sawi chhiat nan leh vau nan lo hmang se la. A titu hming leh address an chhui chhuah tur chu nangmah kha a ni dawn a ni. Eng ang pawhin insawifihlim tum mah la, a buaithlak ve ngawt ang. Tin, misualin Bomb tihpuah nan i hminga SIM registered kha hmang pheih se chuan i chungthu a rit ve khawp ang. Hetiang anih avang hian SIM Card tih nunsa hi kan ramah i zuar lo ngam ang u. Ram leh hnam humhalhna kawngah pawh SIM Card tih nunsa zawrh avang hian kan ram mualphona thlen thei thil tam tak a awm thei a ni. Chuvangin, SIM Card tihnunsa zawrh leh hman hi i bansan vat ang u.

2. Pre-paid SIM Card tihnunsa hman leh Facebook hman hian inzawmna a nei em? Inzawmna pawh lo nei se engnge a pawina awm?

Aw, nei teh reng mai. Mizoram chhunga Facebook hmangtu tam zawk hian Mobile atanga an khawih avangin pre-paid SIM card tihnunsa nen hian inzawmna thuk tak a nei a ni. Mahni hming lova SIM card neih anih tlangpui avangin Facebook a login ID-ah pawh mobile number hmangtu kan tam em em a ni. Facebook kaltlangin duh dah tak takin thu kan POST thin a, heng mite hi han chhui chhuakin man tum dawn ila man an harsa em em a ni. A chhan chu an mobile number hmangin facebook-ah an in-registered a, an mobile number atangin chhui dawn ila an mahni tak ni lovin midang a titu dik tak ni lo man a awl em em a ni. Tin, Facebook-ah khan anmahni hming dik tak an hman loh pheih chuan man chhuah an harsa leh zual thin. Heng avang hian miten an huat zawng sawisel nan leh vau nan te an hmang nasa em em a. Hetiang tih chingho hian ram leh hnam mualphona min thlen theih avangin a pawih em em a ni.

3. Facebook leh Whatsapp ah hian mahni hming lova account (fake account) siam hi danin a phal em? engnge a pawina awm?

Dan phal loh thil a ni. Mahni hming lova Facebook emaw Whatsapp emaw a account siam hi inbumna thil anih avangin dan phal loh a ni. Mi tupawhin account lem (fake account) hmanga mi bum nan a hmang anih chuan kum hnih thleng lungin tantir emaw

pawisa chawitir emaw, a pahniha hremna emaw pek theih a ni (IPC 465). Mi vau nan leh tih hrehawm nan a hmang anih chuan kum thum tantir emaw pawisa chawitir emaw a pahniha hremna pek theih a ni (IT Act 66A). Tin, mi hming mawina tihliau thei zawnga facebook a post anihin hremna kum thum thleng tan tira pawisa chawitir theih bawk a ni (IPC 469).

4. Facebook leh Cable TV kaltlanga Sorkar dodal zawnga thu thehdarh leh sorkar hnathawkte leh Minister-te deusawh taka tih hi danin a phal reng em?

Dan phal loh thil a ni. Facebook leh Cable TV (Fakselna/Mipui Aw) ah te hian sorkar dodal zawng leh mipui fuihpawrh zawnga thu thehdarh ching kan awm hi a pawl tak zet a ni. Heng hi sorkar pawisawina (sedition) a ni a, dan bawhchhiatna a ni. IPC-124 hnuaiah hrem theih a ni a, a hremna chu damchhung (Lifetime) lung in tantir leh pawisa chawitir theihna a ni.

Tin, Sorkar official leh Minister-te an hmingchhiatna tur zawnga thu thehdarhtu te hi dan anga hrem theih an ni a. Intihmingchhiatna (Defamation), IPC-499, hmangin hrem tur a ni. A hremna chu kum hnih lung in tan tir emaw pawisa chawitir emaw a pahniha hremna pek theih a ni.

5. Facebook leh Cable TV (Fakselna/Mipui Aw) kaltlanga Politician-te “Eiru (Corrupt)” a inpuh hi danin a phal em?

Dan phal loh thil a ni. Politician emaw Sorkar hnathawk emaw Court of Law in a eiru ngei a ni tih a finfiah hma chu eiru-ah puh theih a ni lo. Facebook leh Cable TV (fakselna/mipui aw) kaltlanga mituten emaw “chumi-khami chu a eiru” lo tih hi dan bawhchhiatna sual a ni. Hetianga thu lo post-tu chu dan anga hrem theih a ni. A hrem theihna hi intihmingchhiatna (IPC 499) hnuaiah kum hnih lung in tan emaw pawisa chawitir emaw a pahniha hremna pek theih a ni.

Tin, kan thu post avang khan mi’n hrehawm an lo tih phah thei a, hetiang thu dik hriat hmaa inpuhmawhna thu thawndarhtu hi IT ACT 66A hnuaiah hrem theih a ni. A hremna chu kum thum lung in tantir emaw pawisa chawitir emaw a pahniha hremna pek theih a ni.

Chuvangin, tu pawh, politician emaw, Sorkar hnathawk emaw ‘Court of Law’ in a eiru ngei a ni tih a finfiah hma chu tuman eiru-ah kan inpuh tur a ni lo. Chuvangin a thu post-tu kha dan bawhchhetu zawkah a tang hlauh thei a ni.

6. Facebook kaltlanga mi kan huat zawngte hnenah “Pa thau/Zawnga/hmelchhepa/ etc.” va tih hi a pawina a awm em?

Pawina awm teh reng mai. Facebook, SMS, leh eMail kaltlanga mitute emaw kan huat zawngte hnenah “Pa thau/zawnga/ hmelchhepa” va tih ringawt avang hian a lo dawngsawngtu khan a lo huata FIR (First Information Report) a thehluh chuan a thawntu kha dan bawhchhetuah tangin lungin thlenga tantir theih a ni. IT Act 66A hnuaiah chuan mi tupawh tihrehawm tur zawnga electronics message thawn hi phal a ni lova, chutiang ti chu dan anga hrem theih an ni. A hremna chu kum thum tantir emaw

pawisa chawitir emaw, a pahnih a hremna pek theih a ni. Chuvangin facebook a kan thu post turte hi uluk taka ngaihtuah hmasak thin a tha hle. Mi pawisawi zawnga thu kan thawn hi dan bawhchhiatna sual a ni tih kan hre tur a ni.

7. *Ka thianten Facebookah thlalak dukdak lo tak tak, entirnan - nula saruak thlalak te post-in min rawn tagged ta se, a pawina a awm em?*

Awm e. Facebook kaltlanga zahmawh rawngkai (obscene) thlalak an rawn tagged che chuan lo hmu ngei turin an duh che tihna a ni. Mahse, an thlalak rawn tag che chu thlalak dukdak lo, zahmawh rangkai thlalak anih chuan FIR theh lutin a tag-tu che kha dan angin hrem theih a ni. A hremna chu IT Act 66A dan hnuaiha a ni a, kum thum lungin tan emaw pawisa chawitir emaw a pahnih a hremna pek kawp theih a ni.

8. *Anih, ka facebook friend in a ma wall-ah thlalak dukdak lo tak tak, entirnan-nula saruak bakah accident rapthlak tak tak thlalakte kha dah sela chu chu thilsual a ni em?*

Aw ni e. Dan bawhchhiatna sual pakhatatah ngaih theih a ni. Kan hriat theuh angin Facebook-a kan thianta (friend) hian kan wall a thu emaw thlalak emaw video emaw kan Post reng reng hi an hmu thei ve vek thin a. Chuvangin mahni wall pawh nise kan thil Post-te hian mi pawisawi a sawi em tih hi kan ngaihtuah hmasa fo tur a ni. Thlalak dukdak vak lo, mite thin tiphu zawng leh saruak thlalak kan post anih chuan IT Act 67/67A/B hmangin hrem theih kan ni. A hremna chu IT Act 67 hnuaiha kum thum lungin tan bakah cheng nuai nga chawitir theih a ni; IT Act 67A hnuaiha chuan kum nga tantir bakah cheng nuai sawm thleng chawitir theih a ni. Tin, IT Act 67B hnuaiha chuan naupang kum tling lo saruak thlalak emaw videos emaw post anih chuan kum nga lungin tantir leh cheng nuaih sawm chawitir theih a ni bawk.

9. *Facebookah hian tawngkam tlahawlh tak tak hmanga thu post hi phal a ni em?*

Phal a ni lo. Tawngkam tlahawlh tak taka thu post hi dan bawhchhiatna sual a ni tih hi kan hriat a pawimawh hle. Mizoram chhunga facebook hmangtu tam zawk hian tawngkam kan thlahdah, fimkhur lo hle. Hetianga tawngkam inhmuhisitna rawngkai ang chite thu emaw post-tu chu IT Act 67 dan hmangin hrem theih a ni. A hremna chu kum thum lungin tantir emaw pawisa chawitir emaw a pahniha hremna pek theih a ni.

10. *Mi pakhatin Facebook kaltlangin invauna thu min rawn thawn thin a, hei hi thilsual a ni em? Hetianga min titu hi hremna dan a awm em?*

Thil sual ni e. Facebook emaw Whatsapp emaw Mobile Phone emaw hmanga invauna reng reng hi khap tlat a ni. Facebook hmanga invauna hi dan bawhchhiatna sual a nih avangin a thawntu chu dan anga hrem theih a ni. A hremna chu-

- (a) IT ACT 66A – He dan hnuaiha hian Kum 3 lungin tantir emaw pawisa chawitir emaw a pahnih a hremna pek theih a ni.
- (b) IPC 506 – A chunga hremna bakah hian a thu a zirin kum 2-7 lungin tantir belh theih a ni.

- (c) IPC 507- Invauna thu thawn hi fake account (Account lem) emaw SIM card mahni hming lova registered atanga thawn chhuah anih chuan kum hnih dang tan belh tir theih a ni bawk.

11. Social Media kaltlanga eng thu kan post/comment hian nge Jail bang min zuttir thei?

Social Media kaltlanga thu kan post dawn leh Comment dawn reng rengin zawhna pakhat inzawt thin ila. He Post / Comment hi keimah leh ka chungte tana tha lo thei a ni em? Dan bawhchhiatna a ni em? tiin inzawt hmasa ila, 'AW' tih theih a nih chuan Post/ Comment loh ngam tur a ni.

Social Media kaltlanga heng a hnuaiia thu kan post/comment-te hian Jail bang min zuttir thei a ni:

- (a) Sorkar hotu, Minister, Celebrity leh mi tute pawh sawichhiatna leh sawiselna thu post leh comment-in Jail bang a zut theih a ni.
- (b) Sakhaw dang deusawhna leh sawichhiatna lam post leh comment-in Jail bang a zut theih a ni.
- (c) Mi tute pawh 'Zawngsen/Hmela/Uirenu etc, tia thu kan post leh comment-in Jail bang a zut theih a ni.
- (d) Mahni nihna ni lova "Fake Account" kan siamin Jail bang a zut theih a ni.
- (e) Dan-in thiam loh a chantir hma a, sorkar hnathawk leh politician-te 'A eiru',etc intih tawngkam post leh comment-in Jail bang a zut theih a ni.
- (f) Milar (Celebrity) tu emaw hminga Account lo siam ve ringawtin Jail bang a zut theih a ni.
- (g) Mi rilru tina thei thlalak leh video post post emaw tagged-in Jail tan theih a ni.
- (h) Midangte tana hmuh nuam lo, Saruak leh Ruang thlalak leh video thawndarhin Jail bang a zut theih a ni.
- (i) Zahmawh rawngkai leh invauna (tualthah, pawngsual) kaihhnawih thawn darhin Jail bang a zut theih a ni.